

ЎЗБЕКИСТОН – ИСЛОМ ТАРАҚҚИЁТ БАНКИ: ТАРАҚҚИЁТ ЙЎЛИДАГИ ҲАМКОРЛИК

Равшан Вахидович АБДУЛЛАЕВ

профессор

Иқтисод фанлари доктори

Ўзбекистон халқаро ислом академияси

Тошкент, Ўзбекистон

ravshan.v.abdullaev@gmail.com

Аннотация

Мақолада Ислом тараққиёт банкининг Ўзбекистон Республикасидаги 1991 йилдан бугунги кунга қадар фаолияти ҳамда ҳамкорликнинг яқин келажакдаги истиқболлари таҳлил қилинган. Соғлиқни сақлаш, энергетика, қишлоқ хўжалиги, умумтаълим муассасалари, касб-хунар коллежларини қуриш ва жиҳозлаш, автомобиль йўлларини қуриш ва таъмирлаш, кичик ва хусусий бизнесни қўллаб-қувватлаш, давлат молиясини бошқаришда ислохотлар олиб боришга қўмаклашиш каби соҳалардаги яқунланган ва жорий лойиҳалар бўйича статистик маълумотлар келтирилган.

Таянч сўзлар: Ислом тараққиёт банки, Ислом Ҳамкорлиги Ташкилоти, Хусусий секторни ривожлантириш бўйича ислом корпорацияси.

УЗБЕКИСТАН – ИСЛАМСКИЙ БАНК РАЗВИТИЯ: СОТРУДНИЧЕСТВО НА ПУТИ РАЗВИТИЯ

Равшан Вахидович АБДУЛЛАЕВ

профессор

доктор экономических наук

Международная исламская академия Узбекистан

Ташкент, Узбекистан

Email: ravshan.v.abdullaev@gmail.com

Аннотация

В статье анализируется деятельность Исламского банка развития в Республике Узбекистан с 1991 года по сегодняшний день, а также перспективы сотрудничества в ближайшем будущем. Приведены статистические данные о реализованных и текущих проектах в области здравоохранения, энергетики, сельского хозяйства, строительства и оснащения общеобразовательных учреждений и профессиональных колледжей, строительства и ремонта автомобильных дорог, поддержки малого и частного бизнеса, содействия реформированию управления государственными финансами.

Ключевые слова: Исламский банк развития, Организация Исламского Сотрудничества, Исламская корпорация по развитию частного сектора.

Ўзбекистоннинг хорижий давлатлар билан ташқи иқтисодий алоқаларида мусулмон давлатлари алоҳида ўрин тутади. Ўзбекистон

Республикаси Президенти Ш.Мирзиёев Ислом Ҳамкорлиги Ташкилоти (ИХТ) Ташқи ишлар вазирлари кенгашининг Тошкент шаҳрида бўлиб ўтган 43-сессиясидаги нутқида шундай деб таъкидлаган эди: “Ислом олами улкан иқтисодий ва сармоявий салоҳиятга, энергия ресурсларига эга. Улардан оқилона фойдаланиш, ИХТга аъзо давлатлар ўртасида халқаро савдо-иқтисодий, молиявий, сармоявий ҳамкорликни кенгайтириш, мамлакатларимизни боғловчи транспорт йўлакларини яратиш иқтисодий ривожланишнинг юқори суръатларига эришиш имконини беради, бу эса пировардида, бошқа барча соҳаларда ҳам тараққиётнинг асосидир” [1].

Сўнги йилларда Ўзбекистон Республикасида Ислом тараққиёт банки (ИТБ) фаоллигининг ошиб бораётгани кузатилмоқда. Бу, асосан, мамлакат иқтисодиётини ривожлантириш учун банк томонидан ажратилаётган катта ҳажмдаги маблағларда намоён бўлмоқда. Ислом тараққиёт банки халқаро ташкилотдир; амалга оширадиган операциялар турлари, шунингдек, қарз олувчилар билан кредит ва инвестиция шартномаларини амалга ошириш усуллари нуқтаи назаридан, у барча ислом банклари учун сўзсиз, намуна ҳисобланади [6;57]. ИТБ 1973 йил 18 декабрда Ислом Конференцияси Ташкилоти (ҳозир Ислом Ҳамкорлиги Ташкилоти)га аъзо мамлакатлар молия вазирлари йиғилишида ташкил этилган бўлиб, у ўз фаолиятини 1975 йилда бошлаган. Ҳозирги кунда банкка 57 та давлат аъзодир.

ИТБ гуруҳига бир қатор ташкилотлар, хусусан, Ислом тадқиқот ва ўқитиш институти, Ислом инвестициялар ва экспорт кредитларини суғурталаш корпорацияси, Хусусий секторни ривожлантириш ислом корпорацияси ва Халқаро ислом савдо-молия корпорацияси каби ташкилотлар киради. Мазкур гуруҳнинг асосий фаолияти аъзо мамлакатларда ижтимоий-иқтисодий ривожланишни ҳар томонлама қўллаб-қуватлаш, улар ўртасидаги ҳамкорликни рағбатлантириш, шунингдек, ислом молияси саноатини ривожлантиришга қаратилган.

Ўзбекистон Республикаси ва ИТБ ўртасидаги амалий ҳамкорлик мамлакатимиз мустақиллигининг илк давриданок, яъни, 1991 йилдан бошланган. Ўша даврда Ўзбекистон ҳали ушбу ташкилотга аъзо бўлмаган бўлсада, Банк томонидан Имом Бухорий ёдгорлик мажмуаси, Бухородаги Мир-Араб ва Дорул-Ҳадис мадрасалари каби бир қатор тарихий биноларни реконструкция қилиш учун беғараз грантлар ажратилган.

2003 йил сентябрь ойида Ўзбекистон Республикаси ИТБнинг тўлақонли аъзоси бўлди. Ўша йили банк вице-президенти доктор Амаду Бубакар Сисе бошчилигидаги ИТБ делегацияси Ўзбекистонга ташриф буюрди, бунинг натижасида Ўзбекистон ҳукумати ва ИТБ ўртасида келгуси йиллар учун ҳамкорлик дастури белгилаб олинди.

Бугунги кунга қадар мазкур дастур доирасида ИТБ томонидан 42 та лойиҳани амалга ошириш учун, хусусан, соғлиқни сақлаш, энергетика, қишлоқ хўжалиги, умумтаълим мактаблари ва касб-ҳунар коллежларини қуриш ва жиҳозлаш, автомобиль йўлларини қуриш ва таъмирлаш, хусусий тадбиркорлик субъектларини молиялаштириш йўналишларини очиш, давлат молиясини бошқариш тизимини ислоҳ қилишга кўмаклашиш каби соҳаларга 2,0 миллиард АҚШ долларида зиёд маблағ ажратилди.

ИТБнинг 23,8 миллион доллар миқдоридаги кредитлари ҳисобидан 2004 йилда соғлиқни сақлаш соҳасини ривожлантиришга йўналтирилган лойиҳалар амалга оширилди. Хусусан, ҳудудий шошилиш тиббий ёрдам кўрсатиш марказлари ва уларнинг ҳудудий филиаллари тиббий асбоб-ускуналар билан жиҳозланди. Шунингдек, Банк томонидан Ўзбекистондаги онкология муассасаларини модернизация қилиш учун 37,04 миллион доллар, санитария-эпидемиология лабораторияларини замонавий асбоб-ускуналар билан жиҳозлаш учун эса 17,44 миллион доллар маблағ ажратилди.

Таълим соҳасида 5 та касб-ҳунар коллежини қуриш ва жиҳозлаш (10,5 миллион доллар), умумтаълим мактаблари (22,03 миллион доллар) ҳамда

олий таълим тизимини (44,5 миллион доллар) кўллаб-қувватлашга йўналтирилган қатор лойиҳалар амалга оширилди.

Кредит линияларининг салмоқли қисми энергетика, транспорт ва қишлоқ хўжалигини ривожлантиришга йўналтирилди. Мисол тариқасида қуйидаги лойиҳаларни келтириш мумкин: Фарҳод ГЭСини модернизация қилиш (100 миллион доллар), Сирдарё ИЭСнинг “Сўғдиёна” станциясида 500 кВ юқори вольтли линия қуриш (25 миллион доллар), Ғузор–Сурхон станцияларини кенгайтириш (42 миллион доллар), “Тошкент–Термиз” М-39 автомагистралини реконструкция қилиш (167,2 миллион доллар), “Ўзбекистон ҳаво йўллари” Миллий авиакомпанияси учун 4 дона “Боинг” самолёти харид қилиш (170 миллион доллар), замонавий қишлоқ уйлари қуриш (400 миллион доллар), Жиззах ва Сирдарё вилоятларида ирригация ва дренаж тармоқларини тиклаш (52,65 миллион доллар) шулар жумласидандир.

ИТБ гуруҳи таркибига кирувчи Хусусий секторни ривожлантириш бўйича ислом корпорацияси (ХСРИК) 1999 йилда 1 миллиард доллар устав капитали билан ташкил этилган. Ўзбекистон Республикаси 2004 йил декабрь ойида мазкур корпорацияга аъзо бўлди. Ҳамкорликнинг дастлабки йилларида ХСРИК томонидан хусусий сектор лойиҳаларини молиялаштириш учун лизинг асосида технологик асбоб-ускуналарни сотиб олишга 3 миллион доллар ажратилди.

ХСРИК директорлар Кенгаши қарорига мувофиқ кичик ва хусусий лойиҳаларни молиялаштиришда Ўзбекистон Республикаси тижорат банклари учун 2009 йилда 50 миллион доллар, 2012 йилда 80 миллион доллар, 2013 йилда эса 50 миллион доллар миқдорида кредит линиялари очилди. 2017 йил январь ойида мазкур Кенгаш томонидан тижорат банкларига 70 миллион доллар, жумладан, “Микрокредитбанк” учун 12 миллион доллар, “Ипак йўли” банк учун 12 миллион доллар, “Ҳамкор банк” учун 11 миллион доллар, Азия Аллианс Банк учун 10 миллион доллар, “Капитал банк” учун 8

миллион доллар, “Ориент Финанс Банк” учун 5 миллион доллар, “Ўзбеклизинг” учун 7 миллион доллар, бошқа банклар учун эса 5 миллион доллар кредит маблағларининг янги транши тақдим этилиши маъқулланди. Умуман, ХСРИК томонидан ажратилган барча маблағлар ҳисобидан Ўзбекистонда 200 дан зиёд кичик ва ўрта бизнес лойиҳалари амалга оширилиб, улар асосида 3300 дан ортиқ янги иш ўринлари яратилди.

Агар 1991 йилдан 2017 йилгача бўлган давр мобайнида Ўзбекистон иқтисодиёти тармоқлари кесимида молиялаштиришни кўриб чиқадиган бўлсак, улар орасида энг устувор йўналиш энергетика (403,1 миллион доллар), кейинги ўринларда транспорт (348 миллион доллар), қишлоқ хўжалиги ва бошқа тармоқлар бўлганини кузатишимиз мумкин. Шунингдек, сув хўжалигига – 332,6 миллион доллар, аҳолини ичимлик суви билан таъминлаш, санитария ҳолати ва шаҳар инфратузилмасини яхшилашга – 205,9 миллион доллар маблағ ажратилди. Бироқ, бу даврда таълим (34,1 миллион доллар) ва саноат ишлаб чиқариши (70,1 миллион доллар) каби соҳалар нисбатан камроқ молиялаштирилди.

Барча тармоқлар учун ажратилган кредитлар ҳажмининг йиллик таҳлили шуни кўрсатадики, молиялаштиришнинг энг юқори чўққиси (380,7 миллион доллар) 2013 йилга тўғри келади, аммо 2002 йилда молиялаштириш мутлақо амалга оширилмаган. Умуман, таҳлил этилаётган даврда ИТБ Ўзбекистон Республикасини ижтимоий-иқтисодий ривожлантириш учун турли кредитлар кўринишида 1,803 миллион доллар ажратган.

2018 йилнинг сентябрь ойида ИТБнинг ўша даврдаги президенти Бандар Ҳажжар Ўзбекистонга расмий ташриф билан келди. Ушбу ташриф доирасида Ўзбекистон Республикаси ва ИТБ ўртасида 2018–2021 йилларга мўлжалланган стратегик шериклик тўғрисидаги ҳужжат имзоланди. Унга кўра мамлакатга 1,3 миллиард доллар ажратиш кўзда тутилган эди. “ИТБ гуруҳи куни” анжуманида Б.Ҳажар Банк Ўзбекистоннинг иқтисодиёт ва инновацияларни ривожлантиришга қаратилган лойиҳаларини амалга

оширишда қўллаб-қувватлашга тайёрлигини билдирди. Унга кўра, жами кредитлашнинг 475 миллион доллари энергетика, транспорт ва шаҳарсозлик соҳасидаги лойиҳаларга, 300 миллион доллари қишлоқ жойларда уй-жой қурилишига, 140 миллион доллари ижтимоий ривожлантиришга, 85 миллион доллари эса хусусий тадбиркорликка йўналтирилиши режалаштирилган.

Юқоридаги таҳлиллардан кўриниб турибдики, ИТБ ва Ўзбекистон ўртасидаги ҳамкорлик турли даврларда турлича бўлган, яъни, у мамлакатимиз мустақиллигининг илк даврларида анча паст даражада бўлган бўлса, кейинчалик кўтарилиш тенденциясига эга бўлган.

Ўзбекистон Республикаси ва ИТБ ўртасидаги ҳамкорликнинг 1991 йилдан ҳозиргача бўлган ўтган даврини, яқин келажакни ҳисобга олган ҳолда, шартли равишда 3 босқичга бўлиш мумкин:

Биринчи босқич ИТБ ва Ўзбекистон ҳамкорлигидаги “*пассив босқич*” (1991–2002 йил) деб аталиши мумкин. Ушбу даврда Ўзбекистон ИТБ аъзоси бўлмаса-да, ўтган 11 йил мобайнида Банк томонидан 1,8 миллион доллар миқдорида беғараз ёрдам кўрсатилган.

Иккинчи босқич ҳамкорликнинг “*мўътадил босқичи*” (2003–2017 йиллар) сифатида баҳоланади. Ўзбекистон ИТБга аъзоси бўлгандан сўнг Банк томонидан 14 йил давомида 1801,2 миллион доллар (йилига ўрта ҳисобда 128 миллион доллар) миқдорида турли кредитлар кўринишидаги молиялаштириш амалга оширилди. Ушбу давр мобайнида Банк Ўзбекистонни эҳтиёткорлик билан муомала қилиш мумкин бўлган бизнес шерик сифатида кўради ва асосан, кафолатланган шартнома турларини қўллаган ҳолда, маҳаллий банклар воситасида иш тутади. Хатар даражаси нисбатан юқори бўлган мудораба ва мушарака каби шартномаларни истисно қилади ва тадбиркорларни бевосита молиялаштирамайди.

Учинчи босқич – яқин келажакка мўлжалланган ҳамкорликнинг “*фаол босқичи*” 1,3 миллиард доллар (йилига ўртача 433 миллион доллар)

миқдорида кредитлар ажратиш бўйича келишувга эришилди. Бу ерда Банк Ўзбекистонни ишончли ва тажрибали ҳамкор сифатида кўради, у билан самарали ҳамкорлик қилиши ҳамда ўз Уставида белгиланганидек, ИТБга аъзо бўлган давлат ривожига ҳисса қўшиши мумкин.

Хулоса қилиб айтганда, мамлакатимизда ижтимоий соҳа объектларининг ривожланишида Ислом тараққиёт банкининг роли беқиёсдир. Зеро, Банк томонидан мазкур соҳаларга йўналтирилаётган сармоя бевосита халқимиз фаровонлигини янада юксалтиришга хизмат қилмоқда.

ФОЙДАЛАНИЛГАН АДАБИЁТЛАР:

1. Ўзбекистон Республикаси Президенти Ш.М.Мирзиёевнинг Ислом Ҳамкорлиги Ташкилоти ТИВлари 43-сессияси очилиш маросимида сўзлаган нутқи <https://kun.uz/news/2016/10/18/>
2. Абдуллаев Р. Основные принципы Исламского банкинга и тенденции в развитии сотрудничества Узбекистана с Исламским банком развития //Paradigmata roznani, Прага. – 2019. – №1.
3. Байдаулет Е.А. Исломий молия асослари. – Тошкент: O'zbekiston, 2019.
4. Журавлев А.Ю. Принципы функционирования исламских банков. Исламские финансы в современном мире: экономические и правовые аспекты / Под ред. Р.И.Беккина. – Москва: УММА, 2004.
5. Исломий молиялар ва банк тизими (Русчадан Б.Жураев таримаси. – Тошкент: O'zbekiston, 2014. – 464 б.
6. Павлов В.В. Исламские банки в исламском финансовом праве. – Москва: Анкил, 2003. – 256 с.
7. www.isdb.org